



www.qbz.gov.al

FLETORJA ZYRTARE E REPUBLIKËS SË SHQIPËRISË

Botim i Qendrës së Botimeve Zyrtare

Viti: 2017 – Numri: 66

Tiranë – E premte, 31 mars 2017

PËRMBAJTJA

	Faqe
Vendim i Këshillit të Ministrave nr. 241, datë 29.3.2017	3681
Vendim i Komisionit Qendror të Zgjedhjeve nr. 93, datë 27.3.2017	3681
Vendim i Komisionit Qendror të Zgjedhjeve nr. 102, datë 29.3.2017	3683

**VENDIM****Nr. 241, datë 29.3.2017****PËR LIRIMIN NGA DETYRA TË
PREFEKTIT TË QARKUT TË FIERIT**

Në mbështetje të neneve 100 e 114 të Kushtetutës dhe të nenit 5, të ligjit nr. 107/2016, “Për prefektin e qarkut”, me propozimin e ministrit të Punëve të Brendshme, Këshilli i Ministrave

VENDOSI:

Z. Xhevit Bushaj, prefekt i Qarkut të Fierit, lirohet nga kjo detyrë.

Ky vendim hyn në fuqi menjëherë dhe botohet në Fletoren Zyrtare.

ZËVENDËSKRYEMINISTRI
Niko Peleshi

VENDIM**Nr. 93, datë 27.3.2017**

**PËR DHËNIEN E MANDATIT TË
DEPUTETIT TË KUVENDIT,
KANDIDATIT TË LISTËS
SHUMEMËRORE TË PARTISË LËVIZJA
SOCIALISTE PËR INTEGRIM NË
QARKUN LEZHË, PËR PLOTËSIMIN E
VAKANCËS SË NJOFTUAR NGA
KUVENDI I SHQIPËRISË PËR SHKAK TË
MBARIMIT TË MANDATIT TË
DEPUTETIT Z. ARMANDO PRENGA**

Komisioni Qendror i Zgjedhjeve, në mbledhjen e datës 27.3.2017, me pjesëmarrjen e:

Denar Biba	kryetar
Hysen Osmanaj	zëvendëskryetar
Bledar Skënderi	anëtar
Edlira Jorgaqi	anëtare
Gëzim Veleshnja	anëtar
Klement Zguri	anëtar
Vera Shtjefni	anëtare

shqyrtoi çështjen me

OBJEKT: Për dhënien e mandatit të deputetit të Kuvendit, kandidatit të listës shumëmemërore të Partisë Lëvizja Socialiste për Integrim, në Qarkun e Lezhës, për plotësimin e vakancës së njoftuar nga Kuvendi i Shqipërisë, për shkak të mbarimit të mandatit të deputetit të z. Armando Prenga.

KËRKUES: Kuvendi i Republikës së Shqipërisë.

BAZA LIGJORE: Neni 23, pika 1, germa “a”, neni 164, pika 4, neni 175, pika 2, i ligjit nr. 10019, datë 29.12.2008, “Kodi Zgjedhor i Republikës së Shqipërisë”, i ndryshuar.

KQZ-ja, pasi shqyrtoi dokumentacionin e paraqitur dhe dëgjoi diskutimet e përfaqësuesve të partive politike,

VËREN:

Nëpërmjet shkresës nr.735/1 prot., datë 27.2.2017, drejtuar KQZ-së, Sekretari i Përgjithshëm i Kuvendit, znj. Albana Shtylla, ka njoftuar krijimin e vakancës për shkak të heqjes dorë nga mandati i deputetit të Kuvendit të Shqipërisë të z. Armando Prenga, deputet i zonës zgjedhore, qarku Lezhë.

Neni 164 i Kodit Zgjedhor përcakton se në rast të ndërprerjes së mandatit të deputetit, Kuvendi njofton KQZ-në për krijimin e vakancës dhe KQZ-ja merr vendim për dhënien e mandatit të deputetit, kandidatit të radhës në listën shumëmemërore të së njëjtës parti politike në zonën zgjedhore përkatëse, regjistruar sipas nenit 67 të Kodit Zgjedhor.

Në zbatim të nenit 164 të Kodit Zgjedhor, neni 11 të ligjit nr. 138/2015, “Për garantimin e integritetit të personave që zgjidhen, emërohen ose ushtrojnë funksione publike”, dhe kreu II, pika 3, të vendimit nr. 17/2016 të Kuvendit “Për përcaktimin e rregullave të detajuara mbi zbatimin e ndalimeve të parashikuara në ligjin nr. 138/2015”, Komisioni Qendror i Zgjedhjeve, me vendimin nr. 64, datë 20.3.2017, ka vendosur të shpallë moszgjedhshmërinë si deputet në Kuvendin e Shqipërisë të kandidatit të radhës në listën shumëmemërore të Partisë Socialiste, qarku Lezhë, z. Kastriot Filip Piroli, pasi kandidati nuk depozitoi brenda afatit formularin e vetëdeklarimit.

Me shpalljen e moszgjedhshmërisë si deputet i Kuvendit, të kandidatit të radhës në listën shumëmemërore të Partisë Socialiste, qarku Lezhë, z. Kastriot Filip Piroli, rezultoi se lista e kandidatëve të Partisë Socialiste, në zonën zgjedhore qarku Lezhë, ka shteruar. Sipas nenit 164, pika 4, të Kodit Zgjedhor, në rast se lista e kandidatëve të partisë politike, anëtare e një koalicioni ka shteruar, mandati i kalon partisë së koalicionit me herësin më të lartë. Në zgjedhjet për Kuvendin të vitit 2013, Partia Socialiste ka qenë pjesëtare e Koalicionit Aleanca për Shqipërinë Europiane, regjistruar në



KQZ, me vendimin nr. 282, datë 4.5.2013, “Për regjistrimin e Koalicionit Aleanca për Shqipërinë Europiane, si subjekt zgjedhor, për zgjedhjet për Kuvendin 2013”.

Referuar vendimit të Kolegjit nr. 35, datë 2.8.2013, Koalicioni Aleanca për Shqipërinë Europiane ka fituar 3 mandate, Partia Socialiste ka fituar 2 mandate dhe Partia Lëvizja Socialiste për Integrim ka fituar 1 mandat. Sipas nenit 163/2 të

Kodit Zgjedhor, numri i votave të vlefshme të secilës parti të koalicionit, pjesëtohet në mënyrë të vazhdueshme me numra natyrorë tek të njëpasnjëshëm, të quajtur pjesëtues, duke filluar me numrin 1 dhe duke përfunduar me numrin natyror që i korrespondon dyfishit të numrit të mandateve që shpërndahen në zonën zgjedhore përkatëse për koalicionin në fjalë.

SHPËRNDARJA E MANDATEVE PËR KUVENDIN BRENDA KOALICIONIT ALEANCA PËR SHQIPËRINË EUROPIANE, NË ZGJEDHJET E VITIT 2013

Qarku Lezhë

Mandate	1	2	3	4	5	6	7
Parti/pjesëtues	1	3	5	7	9	11	13
PS	26433	8811	5287	3776	2937	2403	2033
LSI	8820	2940	1764	1260	980	802	678
PSD	1017	339	203	145	113	92	78
PBDNJ	658	219	132	94	73	60	51
PDS	573	191	115	82	64	52	44

Herësit e përfutur nga çdo pjesëtim, renditen, sipas tabelës më lart, nga ku rezulton se brenda koalicionit, partia me herësin më të madh (2940) është Partia Lëvizja Socialiste për Integrim. Në këto kushte, mandati i ndërprerë i z. Armando Prenga i kalon Partisë Lëvizja Socialiste për Integrim.

Rezulton se lista shumëmemërore e Partisë Lëvizja Socialiste për Integrim në qarkun Lezhë i plotëson të gjitha kriteret e përcaktuara në nenin 67, të Kodit Zgjedhor, duke përfshirë dhe kriterin e gjinisë. Në këto kushte, zëvendësimi i vakancës do të bëhet sipas përcaktimeve të nenit 164, pika 2, të Kodit Zgjedhor me kandidatin e radhës.

Sipas listës shumëmemërore të kandidatëve për deputet për zonën zgjedhore qarku Lezhë, të Partisë Lëvizja Socialiste për Integrim, rezulton se pas znj. Monika Ramazan Kryemadhi kandidati i radhës është kandidati me numër rendor 2 (dy), z. Petrit Preng Gjoni.

Referuar nenit 11, të ligjit nr. 138/2015, “Për garantimin e integritetit të personave që zgjidhen, emërohen ose ushtrojnë funksione publike”, vetëdeklarimi dhe verifikimi i kushteve të të dhënave në përputhje me këtë ligj, kryhet për çdo kandidat të listës shumëmemërore për zgjedhjet pararendëse, për Kuvendin, të cilit i takon të marrë

mandatin e deputetit për vendin vakant, sipas Kodit Zgjedhor.

Z. Petrit Preng Gjoni, depozitoi formularin e vetëdeklarimit në KQZ si organi kompetent për administrimin, verifikimin, zbatimin e ndalimeve për zgjedhjen dhe emërimin në funksionin publik, deputet i Kuvendit.

Në zbatim të nenit 11 të ligjit nr. 138/2015 dhe kreut V, të vendimit të Kuvendit nr. 17/2016, KQZ-ja bëri publikimin e formularit të vetëdeklarimit në faqen zyrtare të internetit dhe verifikimin e të dhënave në këtë formular, si dhe kërkoi informacion nga zyra e gjendjes civile dhe zyra e gjendjes gjyqësore për kandidatin.

Sipas informacionit të ardhur me shkresën nr. 2452, datë 24.3.2017, nga Zyra e Gjendjes Gjyqësore, në KQZ, rezulton se z. Petrit Preng Gjoni, kandidat për deputet në listën shumëmemërore të Partisë Lëvizja Socialiste për Integrim, qarku Lezhë, është i padënuar nga gjykatat shqiptare.

Nga verifikimi i të dhënave në formularin e vetëdeklarimit të z. Petrit Preng Gjoni, rezulton se, nuk është deklaruar asnjë e dhënë që ka të bëjë me kushtet e ndalimit të zgjedhjes në funksionin e deputetit, sipas ligjit nr. 138/2015, “Për garantimin e integritetit të personave që zgjidhen, emërohen ose ushtrojnë funksione publike”.



Për sa më sipër, mandati i ndërprerë i përket kandidatit të radhës në listën shumemërore të Partisë Lëvizja Socialiste për Integrim në zonën zgjedhore qarku Lezhë, i renditur me numër rendor 2 (dy), z. Petrit Preng Gjoni.

PËR KËTO ARSYE,

Komisioni Qendror i Zgjedhjeve, mbështetur në nenin 23, pika 1, germa “a” dhe nenin 164, të ligjit nr. 10019, datë 29.12.2008, “Kodi Zgjedhor i Republikës së Shqipërisë”, i ndryshuar,

VENDOSI:

1. T’i japë mandatin e deputetit të Kuvendit të Republikës së Shqipërisë, kandidatit të radhës në listën shumemërore të Partisë Lëvizja Socialiste për Integrim Qarku Lezhë, z. Petrit Preng Gjoni.

2. Ky vendim hyn në fuqi menjëherë dhe botohet në Fletoren Zyrtare.

3. Kundër këtij vendimi mund të bëhet ankim në Kolegjin Zgjedhor, pranë Gjykatës së Apelit Tiranë, brenda 5 (pesë) ditëve nga shpallja e këtij vendimi.

KRYETARI
Denar Biba

VENDIM

Nr. 102, datë 29.3.2017

**PËR DHËNIEN E MANDATIT TË
DEPUTETIT TË KUVENDIT,
KANDIDATIT TË LISTËS
SHUMEMËRORE TË PARTISË
SOCIALISTE TË SHQIPËRISË NË
QARKUN FIER, PËR PLOTËSIMIN E
VAKANCËS SË NJOFTUAR NGA
KUVENDI I SHQIPËRISË**

Komisioni Qendror i Zgjedhjeve, në mbledhjen e datës 29.3.2017, me pjesëmarrjen e:

Denar Biba	kryetar
Hysen Osmanaj	zëvendëskryetar
Bledar Skënderi	anëtar
Edlira Jorgaqi	anëtare
Gëzim Veleshnja	anëtar
Klement Zguri	anëtar
Vera Shtjefni	anëtare

shqyrtoi çështjen me

OBJEKT: Për dhënien e mandatis të deputetit të Kuvendit, kandidatit të listës shumemërore të

Partisë Socialiste të Shqipërisë, në qarkun Fier, për plotësimin e vakancës së njoftuar nga Kuvendi i Shqipërisë pas heqjes së mandatis të deputetit të z. Ervin Koçi.

KËRKUES: Kuvendi i Republikës së Shqipërisë.

BAZA LIGJORE: Neni 23, pika 1, germa “a”, neni 164, pika 2, i ligjit nr. 10019, datë 29.12.2008, “Kodi Zgjedhor i Republikës së Shqipërisë”, i ndryshuar.

KQZ-ja, pasi shqyrtoi dokumentacionin e paraqitur dhe dëgjoi diskutimet e përfaqësuesve të partive politike,

VËREN:

Nëpërmjet shkresës nr. 990/1 prot., datë 24.3.2017, drejtuar KQZ-së, Sekretari i Përgjithshëm i Kuvendit znj. Albana Shtylla, njofton krijimin e vakancës për shkak të heqjes dorë nga mandati i deputetit të Kuvendit të Shqipërisë të z. Ervin Koçi, deputet i zonës zgjedhore, qarku Fier.

Neni 164 i Kodit Zgjedhor përcakton se në rast të ndërprerjes së mandatis të deputetit, Kuvendi njofton KQZ-në për krijimin e vakancës dhe KQZ-ja merr vendim për dhënien e mandatis kandidatit të radhës në listën shumemërore të së njëjtës parti politike në zonën zgjedhore përkatëse, regjistruar sipas nenit 67 të Kodit Zgjedhor.

Kolegji Zgjedhor, me vendimin nr. 29, datë 28.3.2013 ka shpërndarë mandatat dhe ka përcaktuar kandidatët fitues për zonën zgjedhore qarku Fier, në zgjedhjet për Kuvendin të vitit 2013. Sipas vendimit të sipërcituar, Partia Socialiste e Shqipërisë, për zonën zgjedhore qarku Fier për zgjedhjet për Kuvendin e Shqipërisë të datës 23 Qershor 2013, ka fituar 9 mandate dhe kandidatët fitues nga lista shumemërore e Partisë Socialiste të Shqipërisë për qarkun Fier, është si më poshtë: me numër rendor 1 (një) z. Gramoz Kaso Ruçi, 2 (dy) z. Erion Mirdash Braçe, 3 (tre) znj. Eglantina Muharrem Gjermani, 4 (katër) z. Ilirjan Hyda Celibashi, 5 (pesë) z. Armando Subashi, 6 (gjashtë) z. Arben Kristaq Çuko, 7 (shtatë) z. Piro Dano Lutaj, 8 (tetë) znj. Majlinda Daut Bufi, 9 (nëntë) z. Ervin Agim Koçi.

Pas njoftimit nga Kuvendi për krijimin e vakancave të njëpasnjëshme, për shkak të heqjes dorë nga mandati i deputetit të Kuvendit të Shqipërisë të z. Ilirjan Hyda Celibashi, znj. Eglantina Muharrem Gjermani, znj. Majlinda Daut



Buqi, z. Armando Nikolla Subashi, deputetë të zonës zgjedhore qarku Fier, Komisioni Qendror i Zgjedhjeve, me vendimin 228, datë 7.5.2015 i ka dhënë mandatin e deputetit të Kuvendit të Republikës së Shqipërisë z. Bujar Avdulla Çela.

Rezulton se lista shumemërore e Partisë Socialiste e Shqipërisë në qarkun Fier i plotëson të gjitha kriteret e përcaktuara në nenin 67 të Kodit Zgjedhor, duke përfshirë dhe kriterin e gjinisë. Në këto kushte, zëvendësimi i vakancës do të bëhet sipas përcaktimeve të nenit 164, pika 2, të Kodit Zgjedhor me kandidatin e radhës. Gjithashtu, konstatojmë se vakanca nuk i përket një mandati të fituar sipas pikës 6, të nenit 67, të Kodit Zgjedhor, për të zbatuar përjashtimin e përcaktuar në nenin 164, pika 2 të Kodit Zgjedhor, fjalia e dytë.

Për sa më sipër, mandati i ndërprerë duhet t'i kalojë kandidatit vijues të listës së Partisë Socialiste të Shqipërisë në zonën zgjedhore qarku Fier.

KQZ-ja, me vendimin nr. 337, datë 11.5.2013, "Për miratimin e listave shumemërore të Partisë Socialiste të Shqipërisë, pjesëtare e koalicionit "Aleanca për Shqipërinë Europiane", për zgjedhjet për Kuvendin e Shqipërisë 2013", ka miratuar listën shumemërore të Partisë Socialiste të Shqipërisë për 12 zonat zgjedhore.

Sipas listës shumemërore të Partisë Socialiste të Shqipërisë për qarkun Fier, kandidati i radhës është kandidati me numër rendor 12 (dymbëdhjetë) z. Xhevit Qemal Bushaj.

Nga verifikimi i dokumentacionit të mësipërm rezulton se personit të cilit do t'i kalojë mandati si deputet për në Kuvendin e Shqipërisë nga lista shumemërore për të plotësuar vendin vakant të krijuar nga ndërprerja e mandatit të z. Ervin Agim Koçi është z. Xhevit Qemal Bushaj, i cili renditet përkatësisht me numër rendor 12 (dymbëdhjetë).

Z. Xhevit Qemal Bushaj, me shkresën nr. 289 prot., datë 27.3.2017, depozituar në Komisionin Qendror të Zgjedhjeve, deklaroi se ka qenë në detyrën e Prefektit të qarkut Fier, nga e cila ka dhënë dorëheqjen e parevokueshme.

Referuar nenit 63, pika 3 dhe pika 4, germa "e", të ligjit nr. 10019, datë 29.12.2008, "Kodi Zgjedhor i Republikës së Shqipërisë" nuk mund të kandidojnë dhe as të zgjidhen pa hequr dorë më parë nga detyra prefektët në vendet ku kryejnë detyrat e tyre për zgjedhjet në Kuvend dhe për organet e qeverisjes vendore.

Me dorëheqjen nga detyra e prefektit përpara zgjedhjes z. Xhevit Bushaj plotëson kushtet e parashikuara nga neni 63 i Kodit Zgjedhor për t'u zgjedhur deputet i Kuvendit të Shqipërisë.

Referuar nenit 11, të ligjit nr. 138/2015, "Për garantimin e integritetit të personave që zgjidhen, emërohen ose ushtrojnë funksione publike", vetëdeklarimi dhe verifikimi i kushteve të të dhënave në përputhje me këtë ligj, kryhet për çdo kandidat të listës shumemërore për zgjedhjet pararendëse, për Kuvendin, të cilit i takon të marrë mandatin e deputetit për vendin vakant, sipas Kodit Zgjedhor.

Z. Xhevit Qemal Bushaj, referuar nenit 3, nenit 5, pika 4, germa "dh", duke qenë në funksionin e Prefektit të qarkut Fier, ka depozituar formularin e vetëdeklarimit në Kryeministri si organi përgjegjës për administrimin, verifikimin, zbatimin e ndalimeve për zgjedhjen dhe emërimin në funksionin publik, që ka pasur në momentin e depozitimit të formularit.

KQZ-ja, me shkresën nr. 1859 prot., datë 27.3.2017, i kërkoi Kryeministrit kopje të formularit të vetëdeklarimit dhe informacionin në lidhje me rezultatet e verifikimit për kandidatin për deputet në listën shumemërore të Partisë Socialiste të Shqipërisë, qarku Fier z. Xhevit Qemal Bushaj.

Nga verifikimi i të dhënave në formularin e vetëdeklarimit të z. Xhevit Qemal Bushaj, rezulton se, nuk është deklaruar asnjë e dhënë që ka të bëjë me kushtet e ndalimit të zgjedhjes në funksionin e deputetit, sipas ligjit nr. 138/2015, "Për garantimin e integritetit të personave që zgjidhen, emërohen ose ushtrojnë funksione publike".

Sipas informacionit të ardhur nga Kryeministria, në KQZ, rezulton se z. Xhevit Qemal Bushaj kandidat për deputet në listën shumemërore të Partisë Socialiste të Shqipërisë, qarku Fier, është i padënuar nga gjykatat shqiptare.

Për sa më sipër, mandat i ndërprerë i përket kandidatit të radhës, pas z. Ervin Agim Koçi, i renditur me numër rendor 12 (dymbëdhjetë) në listën shumemërore të Partisë Socialiste të Shqipërisë në zonën zgjedhore qarku Fier, z. Xhevit Qemal Bushaj.

PËR KËTO ARSYE,

Komisioni Qendror i Zgjedhjeve, mbështetur në nenin 23, pika 1, germa "a" dhe nenin 164, të



ligjit nr. 10019, datë 29.12.2008, “Kodi Zgjedhor i Republikës së Shqipërisë”, i ndryshuar,

VENDOSI:

1. T’i japë mandatin e deputetit të Kuvendit të Republikës së Shqipërisë, kandidatit të radhës në listën shumëmemërore të Partisë Socialiste të Shqipërisë qarku Fier, z. Xhevit Qemal Bushaj.

2. Ky vendim hyn në fuqi menjëherë dhe botohet në Fletoren Zyrtare.

3. Kundër këtij vendimi mund të bëhet ankim në Kolegjin Zgjedhor, pranë Gjykatës së Apelit Tiranë, brenda 5 (ditë) ditëve nga shpallja e këtij vendimi.

KRYETARI
Denar Biba

Formati 61x86/8

Shtypshkronja e Qendrës së Botimeve Zyrtare
Tiranë, 2017

Adresa:
Bulevardi “Gjergj Fishta”
pas ish-Ekspozitës “Shqipëria Sot”
Tel:042427005, 04 2427006

Çmimi 56 lekë